

THIRD CHUUK STATE CONSTITUTIONAL CONVENTION
Weno, Chuuk
Federated States of Micronesia 96942

71st Day (Friday) October 29, 2004 10:00 a. m.

CALL TO ORDER

President Noket: Mwich a poputa, sia welcome-ini kemi meinisin Delegates, kinisou chapur ren ei fansoun, iwe iei ach mwich a poputa, sipwe akom fanafaneno ren iotek.

SILENT PRAYER

Emon me emon Delegates a pusin iotek monomon non ekiekin me netipan.

President Noket: Secretary kopwe ko it.

ROLL CALL

Secretary a kokori iten emon me emon Delegates, Mr. President, ukukun Delegates ir mei nom 8, 6 absent, mi quorum.

President Noket: Iwe mi wor quorum, iei fansoun adoption of journal, Floor Leader Harper.

ADOPTION OF THE JOURNAL

Floor Leader Harper: Kinisou chapur, Mr. President, uwa wanong non motion pwe Convention a adopt-ni Journal-un lon ewe October 12, 2004 non an esap pwan anea. Second.

President Noket: A mokut a puan second pwe Convention a etiwa minutes-in ika Journal-un non ewe October 12, 2004, non an esap puan anea. Ika ese wor osukosuk, chon tipeew ngeni ewe motion apasa U, chon rese tipeew apasa Apw. A ketiw ewe motion Mwich a etiwa ewe Journal-un ewe October 12, 2004. Iwe iei fansoun Secretary.

Secretary: Mr. President, ese wor masowen ach mwich ikenai.

President Noket: Iwe, uwa mochen apasa ai enletin kinisou ngeni kemi meinisin Delegates ren mettoch meinisin a fis, a wes, a fakkun tawe ach angang, sap seni met pwe seni ami achocho ne fori me anganga met epwe tawe ren. Akeaewin, chommong me neich mi fakkun watte ach osukosuken samau, nge ina mwo sisap achanu, iei a fakkun wesino ach angang.

Ua puan fakkun mochen upwe omusomus ngeni ami meinisin Delegates, ren sakkun ai kapas, ai mokutukut, ai forof, esap kan kuri are apwapwai, ika mi kan ochouu netipen emon me emon, ouse fakkun mochen omusano ai tipis.

Puan ai kapasan kinisou ngeni nouch Secretary, ren Hernak Pual, ren an fakkun angangoch, achocho ngeni wisan, ina mo ika mi fakkun weires, ren chommongun wisan seni non Legislature, Tonoas Municipal, tori ach ei Con Con. Ina mwo nge esap fakkun afangafang, a fakkun achocho ngeni met epwe tawe ren ach angang. Puan omusalo tipis ren met sia kan ani nanangaw ika met sia kan ani menemenemang nge ii mi fakkun chok achocho ngeni pwe epwe wes me tawe ach angang. Fakkun kinisou chapur. Puan ai kinisou epwe puan noo ngeni Mrs. Norsi Welle Akira, ren an achocho ngeni ach ei angang, pwe a taweno. Fakkun kinisou chapur, puan ngeni ekkewe ekkoch staff ren meinisin mine ra ani aninis ngeni ach ei angang pwe a fakkun wes are fisioch, iei sia tongeni tori nesopolon ei eu kinikinin.

Puan ach enletin kinisou epwe fakkun noo ngeni nouch kewe meinap ren Governor Walter, Chief Justice, ach enletin kinisou chapur ren ar anisioch ngeni kich non ach ei angang a fakkun fisioch. Ika esap punun ar aninis iwe esap fisioch ach angang.

Puan ngei semach President, me chiechian Senators meinisin, puan Speaker me chiechian Representatives meinisin fakkun kinisou ren ar anisioch ngeni ach ei angang a fisioch me tawe. Nge fan iten ar fakkun anisikich non sakkun aninis meinisin. Nour kewe staff meinisin puan tori ar office, me pisekisekir kei sia fakkun aea non ach ei mwich. Upwe puan niwiniti ach enletin kinisou chapur ngeni nouch kewe meinap meinisin ren all the support ra extended to us. Iei popun a fisioch me tawe ach angang.

Iwe iei met upwe tongeni apasa ren ikenai, nge ach kinisou ngeni nouch kewe meinap meinisin epwe touu ngenir non ewe fansoun Closing. Kinisou chapur. Sipwe mwo asoso.

Mwich a asoso, mwich a puan popusefanita.

President Noket: Chairman Rosokow.

Chairman Rosokow: Kilisou ngeni President, omusalo tipis an epwe lamalam tekia ai poraus. Nge fan iten ekkewe 16 amendments, ren an epwe weires ngeni public, ar repwe weweiti, ika epwe weires ach osukul, iei popun ngang uwa tungor ika mi tufich an Hernak epwe fos lon tape, a walo V6AK. Especially won ekkewe Unicameral proposals, pwe epwe naf an aramas ekis weweiti, ar repwe rongorong won radio, iwe puan an epwe aninis ngeni kich ika pwe esap naf ach fansoun ne osukul. Ika epwe nafangaw ach fansoun ESG, nge repwe tongeni mwan rongorong won radio.

Chairman Fritz: Mr. President.

President Noket: Chairman Fritz.

Chairman Fritz: Enletin ach KILISOU ngeni God, tirow won ewe Samolun ei fonu Weno, pual tirow me kapong ngonuk en President. AMWO KINAMWEN EWE CHON NEMENEM EPWE NONOM REMI, meinisin. Upwe uwei an aramasen Orun

Namoneas kapong, kilisou ngonuk President ren om angangoch, me omw angang murino.

Puan an Orun Namoneas kinisou ngeni chiechiach kewe Delegates meinisin ren met sia fori ika angang fengen won a fakkun fisioch me tawe fan iten tipeew me angang fengen. Puan ngang mi unusen fituk ne apasa ach kilisou ngeni nouch kewe chon angang. Upwe sopwei ach tungor ren ewe osukun, sipwe fakkun achocho ngeni, ika a wor och mettoch a passed, nge mi puan wor met ese pass, ouse mochen sipwe etiwa, eni ina met tipen God. Sipwe apasa sefani ach enletin kinisou chapur ngeni meinisin ekkewe Chairmans, ach tirow me kinisou ngonuk Mr. President. Kinisou chapur.

President Noket: Sipwe mwo asoso.

Mwich a asoso, mwich a puan popusefanita.

Presdient Noket: Chairman Mori.

Chairman Mori: Ua kinisou chapur ren an ei wor ai opportunity ai upwe tongeni apasa ai kapasan kinisou. Upwe fiti ekkewe ra akom ne Congratulate-nuk ren om leadership. Puan ai kinisou ngeni Secretary Hemak me Mrs. Norsy Akira ren ar dedicated to their work. Puan ekkewe secretary are chon angang meinisin, puan ewe Sergeant-at-arm, enletin kinisou chapur ngenir ren ar nikitu me achocho ngeni ach ei angang.

Puan kinisou ngeni aramasen Faichuk meinisin ren met ra fori ika finieita pwe upwe wisen tupunir non ei Con Con, ngang mi fakkun osufonu, me achocho ngeni okunoi we merer. Saingonon upwe kinisou ngeni meinisin Delegates, ren met sa angang fengen won. Mi fakkun chommong differences, nge sia tongeni awesi ach angang pokiten ewe angang fengen mi fakkun wor ren emon me emon neich. Last, upwe kinisou ngeni ai kewe colleague seni Faichuk ren Willy, me Vice President Aten, ren metoch meinisin. Kilisou chapur.

President Noket: Delegate Willy.

Delegate Williander: Akomwan, Kilisou chapur ngeni God, ren ach manaw, pochokul, sa tori ei 71st day ikenai. Kinisou chapur ren an tong. Upwe apasa ai kapong ngonuk Presdient, me chiechiom. Chairman Fritz, me chiechiom. Floor Leader me chiechiom, Chairman Tony Rosokow me chiechiom. Ai enletin kapung, ngeni ami meinisin.

Pual ai kapong ngeni Vice President Aten me Minoru Mori, puan fakkun ai kinisou chapur ngenir ren ach angang a wesino seni nepoputan tori ikenai. Puan ai kinisou upwe apasa ngeni Secretary me Norsy ren ach achocho me nikitu ngeni ach angang, a fakkun taweno. Iwe, fakkun ai kinisou chapur ngonuk Mr. President, ai kapung ngeni Mayor of Weno, Hon. Florentino Robert. Ai kapong ngeni emon re Faichuk mi fakkun achocho, ren Sergeant-at-arm, Mr. Minoru Eram, kinisou chapur ren an achocho ngeni ach angang. Ai kilisou ngeni Governor Walter ren an alilis ngeni kich

non ei angang.

Usap monukano, ai akaewin kinisou ngeni chon Faichuk ren met ra mut ngeni ei pwe upwe wiseni non ei fansoun. Enletin, a meen fakkun watte ai sukul non ei ukukun tamen fansoun fite maram, use chok angang, nge fakkun watte ai sukun, iwe a puan fakkun wattenno ai wewe, seni met uwa kaeo seni ei angang. Iei ai enletin kinisou chapur ngeni ai we kinikin. Iwe KILISOU CHAPUR NGENI GOD, ren meinisin. Kilisou chapur President, Adios Amigo.

President Noket: Floor Leader Harper.

Floor Leader Harper: Kilisou chapur ngeni en President, upwe uwei kapasan omusomus ngeni President, tori Honorable Delegate meinisin. Ren met sa ani mongungu me fofor, upwe tungor omusomus, sap ren met pwe seni nipwakingaw me tiparoch, omusalo tipis.

Ngeni Staff meinisin, omusalo tipis ren met sia kan apasa me fofori ngeni kemi sap ren met pwe sia fen apasa me mwan pwe seni chok ach nipwakingaw me tiparoch, okomusalo tipis. Ai kapasan kilisou ngeni President, uwa fakkun mwareituk, me ingeituk ren om mirit me nikitu, weweoch, enletin ach kinisou chapur ngonuk.

Puan ach kinisou epwe puan noo ngeni chiechiach Delegate meinisin, ika esap wor alilisoeh seni emon me emon esap tawe ach angang. Kilisou ren ami alilisoeh ngeni ach angang, ei popun sia tori sopolon ach angang. Puan ai kilisou ngeni nouch kei staff ren ar ani nikitu me achoch ngeni ar angang. Upwe pwarata ai fen puan kan feel emotional ren ai rong met en President ka kan apasa, ita epwe fen sur mesei ren. Iwe uwa chechemeni kapasan echo kon an ewe sou kol itan Charlie Pride, "I'm not strong enough to hold you, too weak to let you go" Use pochokul ai upwe kamochuta wom ach sipwe akangang fengen. Ami oupwe ne noo seniiei, Adios Amigos.

President Noket: Delegate William, Keiuo.

Delegate William, K.: Akomwan metoch, kilisou ngeni God, sap kich chon fori netipan, nge a fakkun anisikich tori ikenai. Ai kapong ngonuk President, Vice President, Floor Leader, upwe uwei ai kinisou, upwe uwei ai kinisou ngonuk President ren angang murino, a spoon. Fan iten ei angang, ami nikitu, a fakkun wes och ach angang. Ai we kinikin ra filiei pwe upwe tupunir uwa fakkun apasa kinisou chapur ngeni emon me emon neich ren met sia ani angang fengeni pwe epwe efisata tawechun me wesochunon ach angang. Ikenai uwa awewe ewe poraus "Non ewe fansoun Noter, nupwen God a filata ika kori Moses pwe epwe emweni noun kewe aramas. Iwe nupwen Moses a etta won ewe chuk, ina atun ekkewe aramas ra towaw seni God. Nupwen Moses a wato ewe annuk ngeni ekkewe aramas, Moses a amoku ewe annuk, chommong ekkewe aramas ra fiti ewe annuk ne malo" Ai Congratulation ngeni kich meinisin, tirow, oune nom meinisin.

President Noket: Delegate Sirom.

Delegate Sirom: Akoman kilisou ngeni God ren an alisi kich ren ei fansoun. Ewin, upwe kilisou ngeni am we kinikin ren ar ngeni kem am oupwe tupuni am we kinikin. Fakkun kilisou chapur ren an nukunuk me alisi ngeni kem met ei wis ra ngeni kem. Pual kapong ngeni Hernak Pual me Norsy Welle, sergeant-at-arm, kinisou ren ami alilis och ngeni ach angang. Pual kilisu gneni ekkewe con kokoto seni ekkewe Putai ren ar alilisocho ngeni ach angang, nupwen sia kan kokorir pwe repwe etto ren ar repwe ngeni kich ar alilis, iwe ra men fakkun achocho opwonuweta ach koko. Iwe Pual kilisu ngeni Legislature ren ar alilisocho ngeni kich non sakkun ach need me osupwang meinisin. Pual kilisou chapur ngeni semach we Governor non Chuuk ren an alilisocho ngeni ach angang pwe sia tongeni tori ei lesopolon. Saingolon, omusalo tipis meinisin ren met kewe sa kan ani differences esap fen aimu feseni kich, nge epwe fen bring us together. Kilisou chapur ngeni ami meinisin.

President Noket: Iwe ika esap chiwen wor met emon me emon epwe apasa. Mi wor ew annuk pwe sipwe asukula ei mettoch. Mi wor koot fengen non November 3, 2004, ina atun sipwe ne sign. Closing - sopolon mwich, closing ceremony ewpe fis lon ewe fansoun at 10:00 A.M. epwe formal attire. Ren aninisin ion, Secretary me staff repwe awora. Sipwe mwo asoso.

Miwch a asoso, a puan poputasefan.

President Noket: Floor Leader Harper.

Floor Leader Harper: Kinisou chapur Mr. President, uwa fori non motion pwe ei Third Chuuk State Constitutional Convention a adjourned, Sine Die. Second.

President Noket: A mokut a puan second pwe ei Third Chuuk State Constitutional Convention a adjourned, Sine Die, chon tipeew ngeni apasa U, chon rese tipeew ngeni apasa Apw. Convention a Adjourned, Sine Die. Mwich a Sine Die.